

全唐诗卷五百三十六

卷 536_1

【春早郡楼书事寄呈府中群公】许浑

两鬓垂丝发半霜，石城孤梦绕襄阳。
鸳鸿幕里莲披槛，虎豹营中柳拂墙。
画舸欲行春水急，翠帘初卷暮山长。
岷亭风起花千片，流入南湖尽日香。

卷 536_2

【元处士自洛归宛陵山居见示詹事相公钱行之什因赠】许浑

紫霄峰下绝韦编，旧隐相如结袜前。
月落尚留东阁醉，风高还忆北窗眠。
江城夜别潇潇雨，山槛晴归漠漠烟。
一顷豆花三顷竹，想应抛却钓鱼船。

卷 536_3

【送元昼上人归苏州兼寄张厚二首】许浑

自卜闲居荆水头，感时相别思悠悠。
一樽酒尽青山暮，千里书回碧树秋。
深巷久贫知寂寞，小诗多病尚风流。
昼公此去应相问，为说沾巾忆旧游。
三年无事客吴乡，南陌春园碧草长。
共醉八门回画舸，独还三径掩书堂。
前山雨过池塘满，小院秋归枕簟凉。
经岁别离心自苦，何堪黄叶落清漳。

卷 536_4

【送陆拾遗东归】许浑

独振儒风遇盛时，紫泥初降世人知。
文章报主非无意，书剑还家素有期。
秋寺卧云移棹晚，暮江乘月落帆迟。
东归自是缘清兴，莫比商山咏紫芝。

卷 536_5

【湖南徐明府余之南邻，久不还家，因题林馆】许浑

湘南官罢不归来，高阁经年掩绿苔。
鱼溢池塘秋雨过，鸟还洲岛暮潮回。
阶前石稳棋终局，窗外山寒酒满杯。
借问先生独何处，一篱疏菊又花开。

卷 536_6

【酬和杜侍御】许浑

花时曾省杜陵游，闻下书帷不举头。
因过石城先访戴，欲朝金阙暂依刘。
征帆夜转鸬鹚穴，骋骑春辞鹳雀楼。
正把新诗望南浦，棹歌应是木兰舟。

卷 536_7

【酬河中杜侍御重寄】许浑

五色如丝下碧空，片帆还绕楚王宫。
文章已变南山雾，羽翼应抟北海风。
春雪预呈霜简白，晓霞先染绣衣红。
十千沽酒留君醉，莫道归心似转蓬。

卷 536_8

【寄献三川守刘公】许浑

三川歌颂彻咸秦，十二楼前侍从臣。
休闭玉笼留鸂鶒，早开金埒纵麒麟。
花深稚榻迎何客，月在膺舟醉几人。
自笑东风过寒食，茂陵寥落未知春。
半年三度转蓬居，锦帐心阑羨隼旟。
老去自惊秦塞雁，病来先忆楚江鱼。
长闻季氏千金诺，更望刘公一纸书。
春雪未晴春酒贵，莫教愁杀马相如。

卷 536_9

【送段觉之西蜀结婚（一作送段觉之西川过婚礼后归觐）】许浑

词赋名高身不闲，采衣如锦度函关。
镜中鸾影胡威去，剑外花归卫玠还。
秋浪远侵黄鹤岭，暮云遥断碧鸡山。
时人若问西游客，心在重霄鬓欲斑。

卷 536_10

【长庆寺遇常州阮秀才】许浑

高阁晴轩对一峰，毗陵书客此相逢。
晚收红叶题诗遍，秋待黄花酿酒浓。
山馆日斜喧鸟雀，石潭波动戏鱼龙。
上方有路应知处，疏磬寒蝉树几重。

卷 536_11

【赠闲师（一作送令闲上人）】许浑

近日高僧更有谁，宛陵山下遇闲师。
东林共许三乘学，南国争传五字诗。
初到庾楼红叶坠，夜投萧寺碧云随。
秋江莫惜题佳句，正是磷磷见底时。

卷 536_12

【东游留别李丛秀才】许浑

烦君沽酒强登楼，罢唱离歌说远游。
文字岂劳诸子重，风尘多幸故人忧。
数程山路长侵夜，千里家书动隔秋。
起凭栏干各垂泪，又驱羸马向东州。

卷 536_13

【竹林寺别友人（一作与德玄别，一作李玄）】许浑

骚人吟罢起乡愁，暗觉年华似水流。
花满谢城伤共别，蝉鸣萧寺喜同游。
前山月落杉松晚，深夜风清枕簟秋。
明日分襟又何处，江南江北路悠悠。

卷 536_14

【送处士武君归章洪山居（一作送武全通处士归隐洪山）】许浑

形影无群消息沉，登闻三击血沾襟。
皇纲一日开冤气，青史千年重壮心。
却望乌台春树老，独归蜗舍暮云深。
他时纵有征书至，雪满空山不可寻。

卷 536_15

【题义女亭】许浑

身没兰闺道日明，郭南寻得旧池亭。
诗人愁立暮山碧，贾客怨离秋草青。
四望月沉疑掩镜，两檐花动认收屏。
至今乡里风犹在，借问谁传义女铭。

卷 536_16

【吴门送振武李从事】许浑

晚促离筵醉玉缸，伊州一曲泪双双。
欲携刀笔从新幕，更宿烟霞别旧窗。
胡马近秋侵紫塞，吴帆乘月下清江。
嫖姚若许传书檄，坐筑三城看受降。

卷 536_17

【郊居春日有怀府中诸公并柬王兵曹】许浑

欲学渔翁钓艇新，濯缨犹惜九衢尘。
花前更谢依刘客，雪后空怀访戴人。
僧舍覆棋消白日，市楼赊酒过青春。
一山桃杏同时发，谁似东风不厌贫。

卷 536_18

【同韦少尹伤故卫尉李少卿】许浑

客醉更长乐未穷，似知身世一宵空。

香街宝马嘶残月，暖阁佳人哭晓风。
未卷绣筵朱阁上，已开尘席画屏中。
何须更赋山阳笛，寒月沉西水向东。

卷 536_19

【舟行早发庐陵郡郭寄滕郎中】许浑

楚客停桡太守知，露凝丹叶自秋悲。
蟹螯只恐相如渴，鲈鲙应防曼倩饥。
风卷曙云飘角远，雨昏寒浪挂帆迟。
离心更羨高斋夕，巫峡花深醉玉卮。

卷 536_20

【闻边将刘皋无辜受戮】许浑

外监多假帝王尊，威胁偏裨势不存。
才许誓心安玉垒，已伤传首动金门。
三千客里宁无义，五百人中必有恩。
却赖汉庭多烈士，至今犹自伏蒲轮。

卷 536_21

【送薛秀才南游】许浑

姑苏城外柳初凋，同上江楼更寂寥。
绕壁旧诗尘漠漠，对窗寒竹雨潇潇。
怜君别路随秋雁，尽我离觞任晚潮。
从此草玄应有处，白云青嶂一相招。

卷 536_22

【夜归孤山寺却寄卢郎中】许浑

青山有志路犹赊，心在琴书自忆家。
醉别庾楼山色晓，夜归萧寺月光斜。
落帆露湿回塘柳，别院风惊满地花。
他日此身须报德，莫言空爱旧烟霞。

卷 536_23

【赠桐庐房明府先辈】许浑

帝城春榜谪灵仙，四海声华二十年。
阙下书功无后辈，卷中文字掩前贤。
官闲每喜江山静，道在宁忧雨露偏。
自笑小儒非一鹗，亦趋门屏冀相怜。

卷 536_24

【甘露寺感事贻同志】许浑

云蔽长安路更赊，独随渔艇老天涯。
青山尽日寻黄绢，沧海经年梦绛纱。
雪愤有期心自壮，报恩无处发先华。

东堂旧侣勤书剑，同出膺门是一家。

卷 536_25

【泛溪夜回寄道玄上人】许浑

南郭烟光异世间，碧桃红杏水潺潺。
猿来近岭猕猴散，鱼下深潭翡翠闲。
犹阻晚风停桂楫，欲乘春月访松关。
几回策杖终难去，洞口云归不见山。

卷 536_26

【客至】许浑

得路逢津更俊才，可怜鞍马照春来。
残花几日小斋闭，大笑一声幽抱开。
袖拂碧溪寒缭绕，冠欹红树晚徘徊。
相逢少别更堪恨，何必秋风江上台。

卷 536_27

【经李给事旧居】许浑

归作儒翁出致君，故山谁复有遗文。
汉庭使气摧张禹，楚国怀忧送范云。
枫叶暗时迷旧宅，芳花落处认荒坟。
朱弦一奏沉湘怨，风起寒波日欲曛。

卷 536_28

【新兴道中】许浑

芙蓉村步失官金，折狱无功不可寻。
初挂海帆逢岁暮，却开山馆值春深。
波浑未辨鱼龙迹，雾暗宁知蚌鹑心。
夜榜归舟望渔火，一溪风雨两岩阴。

卷 536_29

【下第有怀亲友】许浑

万山晴雪九衢尘，何处风光寄梦频。
花盛庾园携酒客，草深颜巷读书人。
征帆又过湘南月，旅馆还悲渭水春。
无限别情多病后，杜陵寥落在漳滨。

卷 536_30

【中秋夕寄大梁刘尚书】许浑

汴人迎拜洛人留，虎豹旌旗拥碧油。
刁斗严更军耳目，戈鋌长控国咽喉。
柳营出号风生纛，莲幕题诗月上楼。
应念散郎千里外，去年今夜醉兰舟。

卷 536_31

【卧病（时在京都）】许浑

寒窗灯尽月斜晖，佩马朝天独掩扉。
清露已凋秦塞柳，白云空长越山薇。
病中送客难为别，梦里还家不当归。
惟有寄书书未得，卧闻燕雁向南飞。

卷 536_32

【残雪】许浑

忆昨新春霰雪飞，阶前檐上斗寒姿。
狂风送在竹深处，隔日未消花发时。
轻压嫩蔬旁出土，冷冲幽鸟别寻枝。
晚来又喜登楼见，一曲高歌和者谁。

卷 536_33

【和常秀才寄简归州郑使君借猿】许浑

谢守携猿东路长，裊藤穿竹似潇湘。
碧山初暝啸秋月，红树生寒啼晓霜。
陌上楚人皆驻马，里中巴客半归乡。
心知欲借南游侣，未到三声恐断肠。

卷 536_34

【送人之任邛州】许浑

绿发监州丹府归，还家乐事我先知。
群童竹马交迎日，二老兰觞初见时。
黄卷新书芸委积，青山旧路菊离披。
亨衢自有横飞势，便到西垣视训辞。

卷 536_35

【和河南杨少尹奉陪薛司空石笋诗】许浑

暖溪寒井碧岩前，谢傅宾朋盛绮筵。
云断石峰高并笋，日临山势远开莲。
闲留幢节低春水，醉拥笙歌出暮烟。
闻道诗成归已夕，柳风花露月初圆。

卷 536_36

【献鄜坊丘常侍】许浑

诏选将军护北戎，身骑白马臂彤弓。
柳营远识金貂贵，榆塞遥知玉帐雄。
秋槛鼓鼙惊朔雪，晓阶旗纛起边风。
蓬莱每望平安火，应奏班超定远功。

卷 536_37

【寄当涂李远】许浑

赋拟相如诗似陶，云阳烟月又同袍。

车前骥病驾骀逸，架上鹰闲鸟雀高。
旧日乐贫能饮水，他时随俗愿铺糟。
不须倚向青山住，咏雪题诗用意劳。

卷 536_38

【和崔大夫新广北楼登眺】许浑

北望高楼夏亦寒，山重水阔接长安。
修梁暗换丹楹小，疏牖全开彩槛宽。
风卷浮云披睥睨，露凉明月坠阑干。
庾公恋阙怀乡处，目送归帆下远滩。

卷 536_39

【送客自两河归江南（一作西河送客归江南）】许浑

两河庶事已堪伤，南客秋归路更长。
台畔古松悲魏帝，苑边修竹吊梁王。
山行露变茱萸色，水宿风披菡萏香。
遥羨落帆逢旧友，绿蛾青鬓醉横塘。

卷 536_40

【题陆侍御林亭】许浑

野水通池石叠台，五营无事隐雄才。
松斋下马书千卷，兰舫逢人酒一杯。
寒树雪晴红艳吐，远山云晓翠光来。
定知别后无多日，海柳江花次第开。

卷 536_41

【泊蒜山津闻东林寺光仪上人物故】许浑

云斋曾宿借方袍，因说浮生大梦劳。
言下是非齐虎尾，宿来荣辱比鸿毛。
孤舟千棹水犹阔，寒殿一灯夜更高。
明日东林有谁在，不堪秋磬拂烟涛。

卷 536_42

【春日思旧游寄南徐从事刘三复】许浑

风暖曲江花半开，忽思京口共衔杯。
湘潭云尽暮山出，巴蜀雪消春水来。
怀玉尚悲迷楚塞，捧金犹羨乐燕台。
蓟门高处极归思，陇雁北飞双燕回。

卷 536_43

【郊园秋日寄洛中友人】许浑

楚水西来天际流，感时伤别思悠悠。
一尊酒尽青山暮，万里书回碧树秋。
日落远波惊宿雁，风吹轻浪起眠鸥。

嵩阳亲友如相问，潘岳闲居欲白头。

卷 536_44

【送杜秀才归桂林】许浑

桂州南去与谁同，处处山连水自通。
两岸晓霞千里草，半帆斜日一江风。
瘴雨欲来枫树黑，火云初起荔枝红。
愁君路远销年月，莫滞三湘五岭中。

卷 536_45

【春雨舟中次和横江裴使君见迎李赵二秀才同来…寄江南】许浑

芳草渡头微雨时，万株杨柳拂波垂。
蒲根水暖雁初落，梅径香寒蜂未知。
词客倚风吹暗淡，使君回马湿旌旗。
江南仲蔚多情调，怅望青云几首诗。

卷 536_46

【东陵赴京道病东归寓居开元寺寄卢员外宋魏二先辈】许浑

西风吹雨雁初时，病寄僧斋罢献书。
万里咸秦劳我马，四邻松桂忆吾庐。
沧洲有约心还静，青汉无媒迹自疏。
不是醉眠愁不散，莫言琴酒学相如。

卷 536_47

【闻开江宋相公申锡下世二首】许浑

权门阴奏夺移才，駟骑如星堕峡来。
晁氏有恩忠作祸，贾生无罪直为灾。
贞魂误向崇山殁，冤气疑从汨水回。
毕竟功成何处是，五湖云月一帆开。
月落湘潭棹不喧，玉杯瑶瑟奠蘋蘩。
谁能力制乘时鹤，自取机沉在槛猿。
位极乾坤三事贵，谤兴华夏一夫冤。
宵衣旰食明天子，日伏青蒲不敢言。

卷 536_48

【赠所知】许浑

因钓鲈鱼住浙河，挂帆千里亦相过。
茅檐夜醉平阶月，兰棹春归拍岸波。
湖日似阴鼙鼓响，海云才起蜃楼多。
明时又作闲居赋，谁荐东门策四科。

卷 536_49

【谢人赠鞭】许浑

蜀国名鞭见惠稀，驽骀从此长光辉。

独根拥肿来云岫，紫陌提携在绣衣。
几度拂花香里过，也曾敲铎月中归。
莫言三尺长无用，百万军中要指挥。

卷 536_50

【早秋寄刘尚书】许浑

天生心识富人侯，将相门中第一流。
旗纛早开擒虎帐，戈鋌初发斩鲸舟。
柳营书号海山暝，菌阁赋诗江树秋。
昨夜雨凉今夜月，笙歌应醉最高楼。

卷 536_51

【及第后春情】许浑

世间得意是春风，散诞经过触处通。
细摇柳脸牵长带，慢撼桃株舞碎红。
也从吹幌惊残梦，何处飘香别故丛。
犹以西都名下客，今年一月始相逢。

卷 536_52

【归长安】许浑

三年何处泪泑澜，白帝城边晓角残。
非是无心恋巫峡，自缘□臂到长安。
黔江水暖还曾饮，楚岫云深不识寒。
大抵莫教闻雨后，此时肠断不应难。

卷 536_53

【经古行宫】许浑

台阁参差倚太阳，年年花发满山香。
重门勘锁青春晚，深院垂帘白昼长。
草色芊绵侵御路，泉声呜咽绕宫墙。
先皇一去无回驾，红粉云鬟空断肠。

卷 536_54

【秋晚怀茅山石涵村舍】许浑

十亩山田近石涵，村居风俗旧曾谙。
帘前白艾惊春燕，篱上青桑待晚蚕。
云暖采茶来岭北，月明沽酒过溪南。
陵阳秋尽多归思，红树萧萧覆碧潭。

卷 536_55

【贵游】许浑

朝回佩马早凄凄，年少恩深卫霍齐。
斧钺旧威龙塞北，池台新赐凤城西。
门通碧树开金锁，楼对青山倚玉梯。

南陌行人尽回首，笙歌一曲暮云低。

卷 536_56

【赠别】许浑

眼前迎送不曾休，相续轮蹄似水流。
门外若无南北路，人间应免别离愁。
苏秦六印归何日，潘岳双毛去值秋。
莫怪分襟衔泪语，十年耕钓忆沧洲。

卷 536_57

【秋夜与友人宿】许浑

楚国同游过十霜，万重心事几堪伤。
蒹葭露白莲塘浅，砧杵夜清河汉凉。
云外山川归梦远，天涯岐路客愁长。
寒城欲晓闻吹笛，犹卧东轩月满床。

卷 536_58

【将赴京留赠僧院】许浑

九衢尘土递追攀，马迹轩车日暮间。
玄发尽惊为客换，白头曾见几人闲。
空悲浮世云无定，多感流年水不还。
谢却从前受恩地，归来依止叩禅关。

卷 536_59

【寄湘中友人】许浑

莫恋醉乡迷酒杯，流年长怕老年催。
西陵水阔鱼难到，南国路遥书未回。
匹马计程愁日尽，一蝉何事引秋来。
相如已定题桥志，江上无由梦钓台。

卷 536_60

【江上逢友人】许浑

故国归人酒一杯，暂停兰棹共徘徊。
村连三峡暮云起，潮送九江寒雨来。
已作相如投赋计，还凭殷浩寄书回。
到时若见东篱菊，为问经霜几度开。

卷 536_61

【金谷怀古】许浑

凄凉遗迹洛川东，浮世荣枯万古同。
桃李香销金谷在，绮罗魂断玉楼空。
往年人事伤心外，今日风光属梦中。
□□□□□□□，□□□□□□□。

卷 536_62

【经行庐山东林寺】许浑

离魂断续楚江壖，叶坠初红十月天。
紫陌事多难数悉，青山长在好闲眠。
方趋上国期干禄，未得空堂学坐禅。
他岁若教如范蠡，也应须入五湖烟。

卷 536_63

【途中逢故人，话西山读书早曾游览】许浑

西岩曾到读书堂，穿竹行沙十里强。
湖上梦馀波滟滟，岭头愁断路茫茫。
经过事寄烟霞远，名利尘随日月长。
莫道少年头不白，君看潘岳几茎霜。

卷 536_64

【将赴京题陵阳王氏水居】许浑

帘卷平芜接远天，暂宽行役到尊前。
是非境里有闲日，荣辱尘中无了年。
山簇暮云千野雨，江分秋水九条烟。
马蹄不道贪西去，争向一声高树蝉。

卷 536_65

【冬日五浪馆水亭怀别】许浑

芦荻花多触处飞，独凭虚槛雨微微。
寒林叶落鸟巢出，古渡浪高鱼艇希。
云抱四山终日在，草荒三径几时归。
江城向暝东风急，一半乡愁闻捣衣。

卷 536_66

【送别】许浑

溪边杨柳色参差，攀折年年赠别离。
一片风帆望已极，三湘烟水返何时。
多缘去棹将愁远，犹倚危楼欲下迟。
莫殢酒杯闲过日，碧云深处是佳期。

卷 536_67

【寄远】许浑

两叶愁眉愁不开，独含惆怅上层台。
碧云空断雁行处，红叶已凋人未来。
塞外音书无信息，道傍车马起尘埃。
功名待寄凌烟阁，力尽辽城不肯回。

卷 536_68

【新柳】许浑

无力摇风晓色新，细腰争妒看来频。

绿阴未覆长堤水，金穗先迎上苑春。
几处伤心怀远路，一枝和日送行尘。
东口门外多离别，愁杀朝朝暮暮人。

卷 536_69

【旅怀作】许浑

促促因吟昼短诗，朝惊秣色暮空枝。
无情春色不长久，有限年光多盛衰。
往事只应随梦里，劳生何处是闲时。
眼前扰扰日一日，暗送白头人不知。

卷 536_70

【雁】许浑

万里衔芦别故乡，云飞水宿向潇湘。
数声孤枕堪垂泪，几处高楼欲断肠。
度日翩翩斜避影，临风一一直成行。
年年辛苦来衡岳，羽翼摧残陇塞霜。

卷 536_71

【出关】许浑

朝缨初解佐江滨，麋鹿心知自有群。
汉囿猎稀慵献赋，楚山耕早任移文。
卧归渔浦月连海，行望凤城花隔云。
关吏不须迎马笑，去时无意学终军。

卷 536_72

【寄房千里博士】许浑

春风白马紫丝缰，正值蚕眠未采桑。
五夜有心随暮雨，百年无节待秋霜。
重寻绣带朱藤合，更认罗裙碧草长。
为报西游减离恨，阮郎才去嫁刘郎。